



Inatsisartunut ilaasortaq Stine Egede, Inuit Ataqtigiit
Inatsisartut Allattoqarfiat
-/maani

18-02-2019
Suliap nr 2019 - 2469
Takussutissap ilisarnaataa
10028853

Postboks 260
3900 Nuuk
Oqarasuaat (+299) 34 50 00
Naqitanik nassitsigasuaat +299
34 66 66
E-mail: iian@nanoq.gl
www.naalakkersuisut.gl

**Kalaallit meerartaasa 22-t 1951-imi Danmarkimut aallartinneqarnerat pillugu § 37
naapertorlugu apeqqutinut nr. 2019-060-imut akissutit.**

Asasara Stine Egede

Kalaallit meerartaasa 22-t 1951-imi Danmarkimut aallartinneqarnerat pillugu Inatsisartut suleriaasianni § 37 naapertorlugu Naalakkersuisunut apeqquteqarputit. Apeqqutigisatit uannit akisassanngortinneqarsimapput.

Apeqqutinut tamanut akissutikka matuma kinguliini takuneqarsinnaapput.

1. Qanga 1951-imi misileraanertut taallugu meeqqanut 22-nut Danmarkimut aallartinneqartunut tunngatillugu danskit naalakkersuisui pisortatigoortumik naalagaaffik sinnerlugu utoqqatsissagaluarpata, Naalakkersuisut tapersiissagaluarpaat?

Folketingimut ilaasortaasimasoq Juliane Henningsen 2009-mi § 20 naapertorlugu ministeriunermut apeqquteqarpoq, meeqqanut attuumassuteqartunut taakkualu ilaqutaannut danskit naalagaaffiat sinnerlugu ministeriuneq utoqqatserusunnersoq taassungalu taarsiissuteqarluni.

Kalaallit meerartaasa pineqartut 1950-ikkut aallartinneqarneranni Danmarkimiissimanerat Kalaallit Nunaata Danmarkillu ataatsimoorussamik oqaluttuassartaanni pisimasoq alianartuusooq naalakkersuisut isumaqartut, ilaatigut statsministerip akissummini nalunaarutigaa. Aammattaaq statsministerip nalunaarutigaa Kalaallit Nunaanni Danmarkimilu piffissami taamanikkut eqqarsartaaseq malunnartumik allaanerusoq kiisalu Kalaallit Nunaata Danmarkillu ataatsimoorussamik oqaluttuarisaaneranni nunasiaanerup nalaa qaangiussimasutut naalakkersuisut isigigaa.

Statsministerip nalunaarutaani malugineqarsinnaavoq, apeqquummi ujartorneqartutut pisortatigoortumik utoqqatsissuteqarnissamik il. il. naalakkersuisut tungaannit siulliulluni suliniuteqartoqarnianngitsoq.

2009-mi statministerip akissutaani takuneqarsinnaasutut isummap allangortinnissaanut naalakkersuisut tungaannit suliniutinik nalunaarutinilluunniit Naalakkersuisut takusaqarsimanngillat.

Kalaallit meerartaannut 22-usunut 1951-imi Danmarkimut aallartinneqartunut pisortatigoortumik utoqqatsissuteqartoqarnissaa pillugu Folketingimi aalajangiiffigisassatut siunnersuummik maannakkut saqqummiussisoqartoq Naalakkersuisut ilisimavaat.

Danmarkimi naalakkersuisut maannamut nalunaarutaat aallaavigalugit, kiisalu Folketingimi aalajangiiffigisassatut siunnersuummut naalakkersuisut Folketingillu isumaat suli ilisimaneqanngitsut pissutigalugit, isumaqarpunga, piffissami matumani apeqqutit akinissaat ajornartoq.

Taamaalilluni utoqqatsertoqassanersoq taamaalisoqassappallu utoqqatserneq qanoq iluseqassanersoq imaluunniit naammassineqassanersoq ilisimaneqanngilaq. Taamaattumik aalajangernermet taamaattumut Naalakkersuisut qanoq isummissanersut siumut nalunaarutigeriissallugu naleqquttuunngitsoq isumaqarpunga. Tassani pisariaqartumik aalajangersimasumik aalajangertoqarsimanissaa imaluunniit naalakkersuisut tungaannit najoqqutarineqarsinnaasumik isummersimanissaq naatsorsuutigineqassaaq.

2. Naalakkersuisut nunarput sinnerlugu meeqqanik 22-nik isumaginninnermi misileraanermik taasamik pisimasumik akisussaaqataallutik isumaqarpat?

Sammissaq pillugu Landsrådip isumaqatiginninniarnersa misissuataareernerisigut paasineqarsinnaavoq, misiliinermik taaneqartup naammassinissaanut naalakkersuisut Red Barnetimut aamma Dansk Røde Korsimut tapersiinissaannut, taasereernikkut Landsrådet tapersiisimmata.

Aalajangiivissortoqarsimanngilaq taamaalillunilu Landsrådip aalajangiineranut atatillugu oqartussaasunut akisussaaffiuvoq, kisiannili Landsrådimi taasinermik tunngaveqartumik danskit oqartussaasuinut inussiarnersumik nalunaarneruvoq.

Tamanna tunngavigalugu pisunut naammassineqartunut akisussaaqataavinnermut peqataanerup nassuiarnissaa ajornakusoortoq isumaqarpunga, suliami Landsrådip isumaa apeqqutaatinnagu oqartussaasut misiliinermut tapersiinerannut sunniuteqaqataasimanissaa naatsorsuutigineqartariaqarpoq.

Apeqquummut 1-imut akissuteqaatsini inaarutaasumik oqaaseqaatika allatigut innersuussutigissavakka.

3. Naalackersuisut Nunarput sinnerlugu pisortatigoortumik meeqqanut misileraataasunut taamatuttaaq utoqqatsernissaq pissusissamisoorsorivaat?

Apeqqummut 2-mut akissutigisa innersuussutigissavara.

4. Naalackersuisut allamik paasissutissanik qulaani eqqartukkamut tunngatillugu iluatsillugu saqqummiussassanik peqarpat?

Apeqqutigineqartunut annerusumik oqaasissaqanngilanga.

Inussiarnersumik inuulluaqqusillunga



Martha Abelsen